

Konvoi perpaduan pupuk semangat patriotisme

PUTRAJAYA - Konvoi Perpaduan Malaysia Madani yang bertujuan menghidupkan dan menyemarakkan bulan kemerdekaan mampu memupuk semangat patriotisme dalam jiwa setiap lapisan masyarakat.

Ketua Pengarah Jabatan Perpaduan Negara dan Integrasi Nasional (JPNIN), Datuk Che Roslan Che Daud berkata, konvoi disertai 66 orang itu melambangkan 66 tahun kemerdekaan negara akan mengagihkan Jalur Gemilang dan menyantuni rakyat di sepanjang laluan.

"Tujuan konvoi adalah untuk menyemarakkan bulan kemerdekaan dan sentiasa menghidupkan (suasana) dengan mengibarkan Jalur Gemilang.

"Kita akan serahkan Jalur Gemilang di Kawasan Rukun Tetangga (KRT) supaya dapat bersama-sama mengibarkan Jalur Gemilang seiring dengan hasrat kerajaan untuk menyemarakkan bulan kemerdekaan dengan pengibaran Jalur Gemilang," katanya sewaktu majlis pelantikan konvoi itu di sini pada Sabtu.

Che Roslan yang mengetuai konvoi itu berkata, pelbagai aktiviti turut dijiwai sepanjang perjalanan termasuk kempen budi bicara #cakapbaikbaik, penyampaian bakul Rahmah dan gotong-royong.

Beliau berkata, konvoi itu juga bertujuan menyuburkan rasa tanggungjawab terhadap keamanan negara serta mengahargai kemakmuran yang diwarisi daripada

da pemimpin terdahulu.

Sementara itu, seorang peserta, Mastura Mohd Yusoff, 36, berkata, program itu akan menaikkan semangat rakyat Malaysia terutama anak muda.

"Kita baru selesai program 'Ride 7 Masjid' tetapi tetap semangat dengan konvoi perpaduan anjuran JPNIN kerana dapat bersama-sama menyemarakkan bulan kemerdekaan dalam kalangan masyarakat," jelasnya.

Beliau berkata, aktiviti konvoi motosikal berkuasa tinggi terutama melibatkan golongan wanita sering dipandang serong namun ia dapat mendidik masyarakat tentang keselamatan dan peraturan jalan raya. - Bernama

SIN PAH HARIAN (AHAD - 20/08/23)

M / S 13